

Uunga siunnersuut: Imermut oqimaaloquttamut isumaqatigiissummut atatillugu Namminersorlutik Oqartussat Kalaallit Nunaannut tunuarsimaarfiginninnermik atorunnaarsitsinissaat pillugu Inatsisartut aalajangiiffisassaat
(Suliffeqarnermut, Iisimatusarnermut Avatangiisinullu Naalakkersuisoq)

Saqqummiussissut

(Suliffeqarnermut, Iisimatusarnermut Avatangiisinullu Naalakkersuisoq)

Siullermeerneqarnera

FN-ip imarsiornermut suliniaqatigiiffiata (IMO) Imermut oqimaaloquttamut isumaqatigiissut 2004-mi akueraa. Imermut oqimaaloquttamut isumaqatigiissut 8. septembari 2017-imi atuutilerpoq – nunat isumaqatigiissummut akuersisut naammalerneriniit ukioq ataaseq qaangiuttoq. Isumaqatigiissuttip siunertaraa umiarsuit erngi oqimaaloquttameersut eqqunneqarsinnaaneri pinngitsoortitsinniarlugit.

Imeq oqimaaloqutaq imiuvooq, umiarsuup makittarissusia, uersinnaanera, itsinera, patajaassusia sukattarnerilluunniit iluarsiniarlugit umiarsuarmut ikineqartartoq. Erngit oqimaaloquttat annersaat imaanit pisuusarput. Umiarsuarni erngit oqimaaloquttat uumassusillit eqqussat eqqunneqartarnerinut immamilu avatangiisinut siaruartarnerinut annertuumik aallaaviusarput. Taamaattumik imermut oqimaaloquttamut isumaqatigiissummi uumassusillit avataaneersut siaruarnissaat pinngitsoortinniarlugu nunani tamalaani umiarsuarni erngit oqimaaloquttat passunneqartarnerinut nunani tamalaani ataatsimut malitassanik pilersitsisussaammat siunnersuut saqqummiunneqarpoq.

Uumassusillit avataaneersut nunarsuarmi tamarmi ajornartorsiutaanerit annertusiartorpoq, aammalu uumassusillit assigiinngissitaarnerinut aalisarnermullu annertuunik sunniuteqarput. Maannarpiaq uumassusilinnik avataaneersut, imartatsini najugaqavissuunngitsut amerlanggillat, kisiannili silap pissusiisa allanngoriartorneri aammalu umiarsuit Issittumut angalasartut amerliartorneri ilutigalugit uumassusillit avataaneersut amerliartorsinnaapput. Imermut oqimaaloquttamut isumaqatigiissummi uumassusilinnik avataaneersunik, ilaatigut najukkatsinni immami avatangiisinut, uumasut assigiinngissitaarnerinut, aalisarnermut pinngortitamilu isumalluutinut annertuumik ajoqusiisinnaasunik nuussinissap pinngitsoortinneqarnissaa siunertarineqarpoq. Taamaattumik imermut oqimaaloquttamut isumaqatigiissummut ilaalernissarput pingaaruteqarpoq, taamaalilluta aalisarnermut uumassusilinnit, imartatsinni najugaqavissuunngitsunit sunnerneqarnissaa pinngitsoortissagatsigu.

Isumaqatigiissummut akuersinissamut piareersimalluarpugut. Imartani avatangiisinut inatsiserput imermut oqimaaloquttamut maleruagassanik, 1. aggusti 2020-mi atuutsinneqalersussanik imaqaerepoq. Taamaattumik inuussutissarsiutinik ingerlataqartut piumasaaqatitut nutaanut piareersarnissamut ukiuni pingasuni piffissaqartinneqarput. Taamaattumik inuussutissarsiutit ingerlatatta ilarujussuini isumaqatigiissummi piumasaaqatit malinneqareerput.

Tamanna pissutigalugu Imermut oqimaaloquttamut isumaqatigiissutip atuutilerera aningaasaqarnermi aningaasartuutini amerlasuunik kinguneqartussatut naatsorsuutigineqanngilaq. Imartatsini avatangiisinik mianerinninnissarput aammalu kalaallit nunaata nunallu allat imartaasa akornanni uumassusilinnik avataaneersunik nuussisinnaanermik annikillisaanissarput pingaaruteqarpoq. Uumassusillit avataaneersut najukkami imartami avatangiisinut ajoqusiingaatsiarsinnaapput aammalu uumassusillit avataaneersut imartani uumasut assigiinngissitaarnerinut ulorianartorsiortitsisinnaapput.

Taamatut oqaaseqarlunga siunnersuutip akuerineqarnissaa innersuussutigaara.